

Ainda decision pa nombramento di director pa hospital no a cay

ORANJESTAD – Actualmente hunta di supervision di hospital ta ocupa pa yena e vacatura di un director medico di hospital. E posicion aki ta habri desde varios luna caba despues cu Dr. Jaime Falconi su contract no a wordo renoba.

Tin tres candidato cu ta aspira e posicion aki y sigur di e trio aki lo sali e director nobo. Entre nan ta figura un doctor Hulandes cu tin alrededor di un aña trahando den e instituto hospitalario aki. Otro candidato ta sr. Ezzard Cilie cu tin algo mas cu 31 aña trahado den hospital y kende ta un candidato fuerte cerca e trahadonan.

Ainda nada

Segun informacion cu Bon Dia Aruba a obtene di diferente fuente, ainda e decision no a cay encunto e nombramento di e director nobo di HOH. E decision aki tabata programa pa tuma luga e siman aki eventualmente diamars ultimo, pero el a wordo posponi pa otro siman. Ainda no a wordo bisa oficialmente kende lo bay yena e vacatura aki.

Bon Dia Aruba a papia ayera

cu presidente di sindicato ABV, sra. Gina Maduro riba e tardansa di e decision aki. El a confirma cu te ainda e decision no a cay pasobra nan no a wordo informa oficialmente riba e nombramento di e director medico di HOH.

“E decision no a cay, te otro siman”, el a bisa. Sra. Maduro a declara cu eventualmente e decision aki mester a cay e siman aki pero ainda Consejo di Supervision di HOH ta papiando cu e diferente partner y otro siman nan lo tuma e decision.

E sindicalista a laga sa cu diahuebs ultimo nan a bay averigua ki dia e decision lo cay pero nan no a wordo informa riba un fecha specifico, sino cu otro siman lo wordo bisa number di e director nobo di HOH.

No impasse

Sra. Maduro no a confirma si tin algun impasse actualmente cu e nombramento di e director nobo considerando cu ABV representando e trahadonan tin un candidato di preferencia. Durante e reunion cu a wordo teni pa scucha opinion di sindicato ABV encunto cada un di e candidatonan pa asina Hunta di Supervision forma su mesun decision papiando riba



cada un di e partinan envolvi kien. Entre otro aspecto cu a wordo analisa ta kico nan ta spera di e director nobo.

El a confirma cu Ezzard Cilie ta e candidato di nan preferencia pasobra den dje ta bisto cu e ta e candidato mas fuerte. Aunke tin e Hulandes cu tin un aña na HOH, pero ainda e ta un persona desconoci den hospital mes, el a bisa.

Sindicato no kier perde un candidato potencial como

meneer Cillie kende tin mas cu tres decada di experiencia trahando den hospital. “Den 30 aña den organisacion e ta conoce paden di organisacion y tur hende sa ken e ta”, asina el a culmina su declaracion na Bon Dia Aruba ayera.

Cao

Presidente di ABV, sra. Gina Maduro a yega di declara recientemente na Bon Dia Aruba cu actualmente nan ta den proceso pa cera un proceso di

negociacion di un Contrato Colectivo (Cao) nobo pa un aña cu a caduca fin di juni ultimo. Pero ta sumamente importante cu prome cu e Cao wordo firma lo tin un director medico nobo di HOH.

E sindicato ta spera di cera e capitulo di negociacion di e Cao, ya cu e trahadonan a cuminsa bira inkieto. Nan ta spera cu pa rond di 12 di september nan lo por firma e Cao nobo; pero pa esaki Hospital mester tin un director. □